

Leta Houwan Diyon I Leli

Baaba Houwan

Leta ya ana toleleli heiya Diyon, Sebedi natuna. Iya Yesu wana apostolo etega ge iya al buki Diyon ana toleleli.

Diyon leta ya i ginol kaiwena topankite kakakawel enuna hi gan ekelesiya elana. Heliya hi ba tage panayawi bugulina toto bosowaina ta pihikan heliya nak ana labi, yaa yayaluwa bugulina toto nige bosowaina ta pihikan heliya waisi ana labi. Inoke hi ba Yesu i getoga, Keliso i getoga. Hi ba Yesu iya gamagal—he panayawi bugulina to, nak ana labi. Ge hi ba Keliso iya yayaluwa—he yayaluwa bugulina to, waisi ana labi. Hi ba Keliso i neem Yehoba elana ge i tuk i holaviya gamagal Yesu elana. Yaka hi ba Yesu nige Yehoba Natuna i oola, nige Keliso o ebo ta ba Mesaiya i oola. Nuwatu gegegena o kaiwena, inoke Diyon leta ya i ginol ge toekelesiya i ba pagasisel panpankiti toto abatelipuna elana hi hago nihi kukuhikan (ololana 2:24). Ge i ba Yesu iya Mesaiya, Yehoba Natuna, toto i nem panayawi ge i tabwa gamagal (2:22; 4:2, 14-15; 5:1,6).

Topankite kakakawel enuna hi ba tage Yesu wana babitaiso elana yayaluwa Keliso i nem i miminaa gamagal Yesu elana, ge tage yayaluwa Keliso gamagal Yesu i eguluwai ga mulaa abwe i yaomal. Inoke awalehina 5 puna 6 elana Diyon wali nuwatu i ba pasapu i ba, “Yesu Keliso iya gamagal hot, i babitaiso ge wana tuwalali i ginol i na ana siga i yaomal. Iya maisena ya ge tuwana hot elana i yaomal wala gegi kaiwena.”

Topankite kakakawel hi ba al hauna ginol ta giginol nige ana nuwatu i nonoek yayaluwala ana pwamwal elana, kaiwena ginol ta ginol iya panayawi bugulina, yaa pwamwal iya yayaluwa bugulina. Yaa Diyon toekelesiya i ba pagasisel bahi gegi paganina nihi giginol (ololana 2:1; 3:7-8), yaa Yehoba wana logugui nihi henapuan (2:3-4).

Etega al, topankite kakakawel hi ba heliya wali aatena misusumena etega i gan ge i teli pagetoga-agil wali pan Kelisitiyani gegewel al elal. Yaka heliya hi pihigelgel avaliyau al elal. He nuwatu bwabwatana etega Diyon i leli leta ya gamwanaa, heiya toabulilek taliliyau ge nuliya nihi nunuwana-agil (ololana 3:14; 4:20-21).

Baaba toto Yawalila I Pem Bana

1 ¹Baaba toto yawalila i pem ha wasawasa-an eliyamiu. Mulaa abwe bugul gegewel hi gan, iya iyoho i gan. He ama anana ha hago, ha kiteya matameya, ha gayawaan ge ha pihikana nimameya.^a ²Gamagal toto yawalila i pem i masal. He toto yawal mihomihotina i gana elana ha kite, inoke ha wasawasa-an ge ha papaatena-an eliyamiu. He valila alona Tamana hi mina, yaa abwe i masal eliyama.^b ³Gamagal toto ha kite ge anana ha hago, iya te ha wasawasa-an eliyamiu, kaiwena nuwama alomeyau komiu ta heliheliyam pamaisena avalau Tamala ge Natuna Yeisu Keliso. ⁴Ge leta ya ha leleli eliyamiu, kaiwena nuwama alomeyau komiu yaliyaya ta kalaopopwi.^c

Ta Nanawaa Mwananala

⁵Wasa toto ha hagowa Yeisu Keliso elana ge ha wasawasa-an eliyamiu i ola hiwe: Yehoba iya mwananal ge nige gogou etega i gagana elana.^d ⁶Inoke ebo ta ba, “Aloma ha heliheliyam,” ge ta nanawaa gogouwa, he wala baaba ge wala ginol elana kila tokakawi.^e ⁷Yaa ebo ta nanawaa mwananala ni ola iya iyoho mwananala, inoke avala iya ta heliheliyam, yaka avalau ge avalau ta heliheliyam ge Natuna Yeisu saliyana wala gegi gegewena i ulul yoho ge ta yanayana.

⁸Ebo ta ba, “Nige no gegi i gagan,” he totola ta kakawela ge nige baaba tutunahotina i gagana eliyala.^f ⁹Yaa ebo wala gegi ta pamasal Yehoba elana, iya wana pagan i sapu, ge bosowaina ana mel ta teli, inoke wala gegi ni nuwayoho, ge wala pagan nanakina gegewena ni ul yoho ge ta yanayana.

¹⁰Ebo ta ba, “Nige gegi etega ya giginol,” he Yehoba ta awa tokakawian to,^g ge wana baaba nige ta aahe i miminaa eliyala.

2 ¹He natuwau, leta ya ya leleli eliyamiu kaiwena nuwau bahi gegi nuku giginol. Yaa sauga ebo kila etega gegi ni ginol, he ala Tolabe etega i gan, iya tosasapona Yeisu Keliso, i baaba Tamala elana kaiwela.^h ²Iya wala gegi powonina. He nige tage i yaomal kila ya wala gegi kaiwena, yaa i yaomal gamagalau panayawiya gegewela wala gegi kaiwena.ⁱ

Logugui ana Henapuan ge Nunuwana Paganina Bana

³Ebo Yehoba wana logugui ta henapuan, inoke eliyana wala aatena i gan te iya ta atena. ⁴Ebo gamagal etega ni ba, “Yehoba ya atena”

^a 1:1 Diyo 1:1 ^b 1:2 Diyo 1:14 ^c 1:4 Diyo 16:24 ^d 1:5 1Tim 6:16; Yem 1:17

^e 1:6 1Diy 2:4 ^f 1:8-9 Same 32:5; BaPa 28:13 ^g 1:10 Yehoba iyaka i ba haba gamagalau gegewel gegi hi giginol, lolana Aiseya 53:6 ge 64:6. ^h 2:1 Hib 9:24 ⁱ 2:2 Diyo 1:29; Kols 1:20; 1Diy 4:10

ge nige wana logugui ni hehenapu-an, he iya tokakawi ge nige baaba tutunahotina i gagana elana. ⁵Yaa ebo gamagal etega Yehoba wana logugui ni henapuan, he wana nunuwana Yehoba elana iyaka i paolaolaek. Ta atena te ta minaa Yehoba elana ni ola hiwe:^j ⁶ebo ta ba tage ta minaa elana, he yawalila ana nawanawa ni ola Yeisu wana nawanawa.

⁷No heliyamwau nunuwani, logugui toto ya leleli eliyamiu^k nige logugui vavaluna i oola. He iya logugui bebeyanana toto abatelipuna elana sauga ku abulilek hi baunan eliyamiu. Iya panpankiti toto iyaka hi baunan eliyamiu ge ku hago.^l ⁸Yaa i ola al, logugui toto ya leleli eliyamiu i vavaluna. Ana vavaluna o ana patunahot ta kiteya Keliso elana ge i ola al eliyamiu. He i vavaluna, kaiwena gogou ana sauga i momowasi ge mwananal tutunahotina iyaka i yana.^m

⁹Ebo etega ni ba, “Nau ya minaa mwananal gamwanaa” ge ebo i pihigelgel talina elana, he iya iyoho ya gogou gamwanaa.ⁿ ¹⁰Ebo etega talina i nunuwana-an, iya i minaa mwananal elana, he nige nak i gagana elana ge tage alona ni pagegi.^o ¹¹Yaa ebo etega i pihigelgel talina elana, iya i minaa gogou gamwanaa. I nanawaa gogou gamwanaa ge nige i aatena te ga i nonoek, kaiwena gogou matana i pakai.^p

Bahi Panayawi ge Bugulina Ona Nuku Nunuwana-agil

- ¹² Natuwau, baaba ya ya leleli eliyamiu,
kaiwena Keliso alana elana
Yehoba wami gegi iyaka i nuwayoho.
- ¹³ Tonowakau ge nevenakau,
baaba ya ya leleli eliyamiu,
kaiwena Keliso, iya iyoho
i gan abatelipuna elana, iyaka ku atena haba.
Hevalau ge gamainau,
baaba ya ya leleli eliyamiu,
kaiwena tonanakina
Seitani iyaka ku pakokove.
- ¹⁴ Wawayau, baaba ya ya leleli eliyamiu,
kaiwena Tamamiu
labulabumwa iyaka ku atena haba.
Tonowakau ge nevenakau,

j 2:5-6 Diyo 14:21,23 k 2:7 Yeisu wana baaba toto Diyon 13:34 elana Diyon i nuwatan inoke i baaba logugui i vavaluna ge i beyanana bana. Yeisu i ba, “Logugui vavaluna sauga ya na pewa: nuku penunuwana-agimiu.” He logugui o bana te Diyon i baaba puna 7 ge 8 elal, ge i ola al puna 9 ana siga 11 elal. l 2:7 Diyo 13:34; 2Diy 5-6 m 2:8 Loma 13:12; Diyo 1:9 n 2:9 1Diy 4:20 o 2:10 Loma 14:13 p 2:11 Diyo 12:35

baaba ya ya leleli eliyamiu,
 kaiwena Keliso, iya iyoho
 i gan abatelipuna elana, iyaka ku atena haba.
 Hevalau ge gamainau,
 baaba ya ya leleli eliyamiu,
 kaiwena ku gasisi. Yehoba wana baaba i minaa eliyamiu inoke
 tonanakina Seitani iyaka ku pakokove.

¹⁵Bahi panayawi ge bugulina ona nuku nunuwana-agil. Ebo nuku
 nunuwana-agil, he Tamamiu labulabumwa nige ana nunuwana i gagan
 eliyamiu.^q ¹⁶He panayawi bugulina hi ola hiwe: pagan bolo tuwala
 nuwana, bugul bolo ta kitel ge nuwala i noek, gogomwau ge wasawasa
 ana hanahanaha. Bugul gegewena bolo ona ya nige i neneem Tamala
 elana, yaa i neem panayawiya.^r ¹⁷Panayawi ge bugul gegewel hi minaa
 gamwanaa bolo gamagalau nuwaliya, heliya hi momowasi, yaa gamagal
 toto i ginol i ola Yehoba wana nuwatu ni mihot sauga gegewena nige ni
 momowasi.^s

Nuku Matahikagimiu Keliso ana Topihigelgel kaiweliya

¹⁸Natuwau, sauga mowamowasena iyaka i kelakelaubwa. Iyaka ku
 hago te Keliso ana Topihigelgel iya i nenem. He Keliso ana topihigelgel
 hi gewi iyaka hi masal, inoke eliyana ta atena te sauga mowamowasena
 iyaka i kelakelaubwa.^t ¹⁹Valila hi minaa wala boda elana ge abwe
 hi eguluwagila. Yaa heliya nige wala boda gamagaliliyau hot i oola.
 Binimala heliya wala boda gamagaliliyau hot, he heliya iyahe avalau ta
 minamina. Yaa iyaka hi eguluwagila, inoke iyaka ta kitel te gegewel nige
 wala boda gamagaliliyau i oola.^u

²⁰Yaa gamagal bwabwalena Keliso, iya Yayaluwa Bwabwalena i ligin
 komiu eliyamiu, inoke baaba tutunahotina ku atena.^v ²¹Nige tage baaba
 tutunahotina nige ku aatena ge kaiwena leta ya ya leleli eliyamiu. Yaa
 leta ya ya leleli eliyamiu kaiwena baaba tutunahotina iyaka ku atena, ge
 ku atena ya te kakawi nige i neneem baaba tutunahotina elana.

²²Henala tokakawi? Tokakawi iya te gamagal toto i ba, “Yeisu iya nige
 Mesaiya i oola.” Gamagal toto i ba ola o, he Yehoba Tamala ge Natuna i
 towaagil, inoke iya Keliso ana topihigelgel.^w ²³Gamagalau bolo Natuna hi
 towani, he Tamana nige i gagana elal. Yaa gamagalau bolo wali abulilek
 Natuna elana hi ba pamasal hi ba, “Iya Mesaiya,” he Tamana al i gan elal.^x

²⁴He baaba tutunahotina, toto abatelipuna elana sauga ku abulilek hi
 baunan ku hago, ni minaa komiu atemiwa. Ebo ni minaa atemiwa, inoke

^q 2:15 Loma 8:7 ^r 2:16 Loma 13:14 ^s 2:17 Mat 7:21 ^t 2:18 Mat 24:5,24; 2Diy 7

^u 2:19 Tuw 20:30 ^v 2:20 1Kol 2:15 ^w 2:22 1Diy 4:3; 2Diy 7 ^x 2:23 Diyo 5:23;
 1Diy 4:15; 5:1

komiu nuku mina Yehoba Natuna Yeisu alona ge Tamana elal. ²⁵Ge Yeisu iya iyaka i bateli elala te yawal mihomihotina ni pem.

²⁶Baaba bolo o ya lelelian eliyamiu ge na baewa eliyamiu bolo nuwaliya nihi pagedemi kawaiya. ²⁷Yaa Keliso Yayaluwa Bwabwalena i ligin komiu eliyamiu, ge iya iyoho i minaa eliyamiu. Inoke nige bosowaina topankite getoga etega al nuku loyaan ge ni panpankiti eliyamiu. He Yayaluwa Bwabwalena bugul gegewena i panpankiti eliyamiu, ge wana panpankiti eliyamiu i tunahot, nige i kakakawi. Inoke nuku minaa Keliso elana ni ola Yayaluwa Bwabwalena i pankitemiu.^y

Kila Yehoba Natunau Inoke Pagan Sasapona Ta Awaawaginol

²⁸He natuwau, nuku minaa Keliso elana, inoke sauga ebo ni sikalim, atela ni matuwa ge bahi ta pupuluwawi te ta talmilil matanaa. ²⁹He ku atena te Keliso iya tosasapona hot, inoke nuku atena te gamagalau gegewel bolo pagan sasapona hi awaawaginol heliya Yehoba natunau.^z

3 ¹Ku nuwatu ga! Tamala wana nunuwana eliyala ana bwata geb o ge i awa Yehoba natunau-agila. Ge tunahot kila ta ola to. Yaa panayawi gamagaliliyau nige hi aatenala, puna kaiwena Yehoba nige hi aatena.^a

²No heliyamwau nunuwani, sauga ya kila Yehoba natunau, yaa nige ga i papankitela bwaliga ga ta ola. Yaa ta atena te sauga ebo Keliso ni sikalim, nasi ta kite ana awa hot elana, inoke kila ta ola iya.^b ³He gamagalau gegewel bolo ginebi wali atimatuwa hi matamatan Keliso nihi kite, heliya wali pagan hi matahikan i yanayana, i ola Keliso i yanayana. ⁴Yaa gamagalau bolo gegi paganina hi giginol, heliya Yehoba wana logugui ana tolekaleka. He gegi paganina heiya te Yehoba wana logugui ta leke.

⁵Ku atena te Keliso i masal puna te wala gegi ni leke yoho, ge ku atena nige sauga etega gegi i giginol.^c ⁶Inoke gamagalau gegewel bolo hi minaa Keliso elana nige gegi paganina hi aawaawaginol. Yaa gamagalau bolo gegi paganina hi giginol, nige sauga etega hi kikite ge nige hi aatena.

⁷Natuwau, bahi gamagal etega ni papagedemi. Henala ebo pagan sasapona i awaawaginol, he iya gamagal sasapona, i ola Keliso iya gamagal sasapona. ⁸Yaa henala ebo gegi paganina i awaawaginol, he iya Seitani natuna, kaiwena abatelipuna elana ge i nem ana siga sauga ya Seitani iyoho i gegegi. He Yehoba Natuna i masal puna te Seitani wana tuwalali ni apanak ge ni pwamowasi.^d

⁹Gamagalau bolo hi tabwa Yehoba natunau nige gegi paganina nihi aawaawaginol, kaiwena yawal toto i neem Yehoba elana i minaa elal. He nige bosowailiya gegi paganina nihi awaawaginol, kaiwena Yehoba

^y 2:27 Diyo 16:13 ^z 2:29 1Diy 3:10 ^a 3:1 Diyo 1:12-13; 16:3 ^b 3:2 2Kol 3:18

^c 3:5 Diyo 1:29; 1Pit 2:22-24; 1Diy 2:2 ^d 3:8 Diyo 8:44

te Tamaliya.^e ¹⁰Inoke Yehoba natunau ge Seitani natunau ali euna i ola hiwe: ebo gamagal etega nige pagan sasapona ni giginol, he iya nige Yehoba natuna i oola. I ola al, ebo gamagal etega nige talina ni nununuwana-an, he iya nige Yehoba natuna i oola.

Ta Penununuwana-agila Ni Ola Keliso wana Logugui

¹¹He panpankiti toto abatelipuna elana sauga ku abulilek ku hago, i ba ola hiwe: nuku penununuwana-agimiu.^f ¹²Bahi wami pagan ni oola Keni, iya tonanakina Seitani natuna, yaka talina i tagapaaliga. Ge hauna kaiwena talina i tagapaaliga? Kaiwena iya wana ginol hi nak ge talina wana ginol hi sapu.^g ¹³Inoke taliwau ge nuwau, bahi atemiu ni yoyou ebo panayawi gamagaliliyau nihi pihigelgel-agimiu.^h

¹⁴Ebo talilau ta nunuwana-agil, inoke ta atena te yaomal ana labi iyaka ta eguluwan ge ta kalapanetim yawal ana labi elana. Yaa ebo gamagal etega talina nige i nunuwana-an, iya iyoho i minaa yaomal elana.ⁱ

¹⁵Kaiwena henala ebo talina i pihigelgel-an iya totaulol, ge ta atena te totaulol nige yawal mihomihotina i gagana elal.^j

¹⁶Keliso yawalina i talamwan kaiwela, inoke wana ginol o eliyana nunuwana ana pagan ta atena. Inoke kila al ge bosowaina yawalila ta talamwan talilau ge nulau kaiweliya.^k ¹⁷Ebo gamagal etega bugul gegewena i olaolaek elana, ge ebo talina i kite bugul enuna i kalaan, yaa nige ni aatilomwan-an ge ni lalabe, he nige Yehoba ana nunuwana i gagana elana.^l ¹⁸Natuwau, bahi tage hohopela ya elana ta nunuwana, yaa ta nunuwana tunahot ginebi ge wala ginol.^m

¹⁹⁻²⁰Ebo talilau ta nunuwana-agil, inoke eliyana ta atena kilau baaba tutunahotina natunau. Inoke bwagana atela elana ta nuwatu tage kila nige ta wawaisi, he atela ta pamatuwa ge ta nuwa laumwal Yehoba matanaa. Kaiwena Yehoba wana atilomwan atela wana nuwatu i bwata lake ge Yehoba atela i atena haba. ²¹Inoke no heliyamwau nunuwani, iyaka ta nuwa laumwal ge nige atela elana ta nunuwatu tage kila nige ta wawaisi, inoke atela i matuwa nige ta pupuluwawi ta nok Yehoba elana.ⁿ ²²Inoke hauna gun ebo ta awanuni elana, i pem elala, kaiwena wana logugui ta henapuan ge pagan toto i yaliyaya-an ta giginol. ²³He wana logugui i ba ola hiwe: Natuna Yeisu Keliso ta abulilek-an ge ta penununuwana-agila ni ola logugui toto i baunan elala.^o ²⁴Bolo Yehoba wana logugui hi henapuan, hi minaa elana ge iya i minaa elal. Ge Yayaluwana iyaka i pem i holaviya elala, inoke eliyana ta atena te iya i minaa elala.^p

^e 3:9 1Diy 5:18 ^f 3:11 Diyo 13:34 ^g 3:12 Aba 4:8 ^h 3:13 Diyo 5:18-19

ⁱ 3:14 Diyo 5:24 ^j 3:15 Pan 21:8 ^k 3:16 Diyo 13:1; Gal 1:4 ^l 3:17 Log 15:7

^m 3:18 Yem 2:15-16 ⁿ 3:21 Hib 4:16 ^o 3:23 Diyo 6:29; 13:34 ^p 3:24 1Diy 4:13

Palopitau wali Baaba Nuku Hile

4 ¹No heliyamwau nunuwani, palopitau kakakawel hi gewi iyaka hi tagilan hi na panayawi labena gegewena elal. Inoke gamagalau bolo yayaluwa etega i pabaaba-agil, bahi gegewel nuku aabulilek-agil, yaa yayaluwa ona nuku hilel ga, inoke nuku atena te ebo hi neem Yehoba elana o ebo nigeya.^q ²Yehoba Yayaluwana ana aatena nuku atena ni ola hiwe. Ebo yayaluwa etega gamagal ni pabaaba ni ba, “Yeisu Keliso i nem i tabwa gamagal,” he Yayaluwa o i neem Yehoba elana.^r ³Yaa ebo yayaluwa etega gamagal ni pabaaba ge nige ni babaa ola o Yeisu kaiwena, he yayaluwa o nige i neneem Yehoba elana, i neem Keliso ana Topihigelgel elana. Iyaka ku hago te iya i nenem, he iyaka i nem haba iyehe i tuwatuwalali panayawiya.^s

⁴He natuwau, komiu Yehoba wana gamagalau, ge palopitau kakakawel iyaka ku gasisi luwagil. Kaiwena Yayaluwa toto i minaa eliyamiu i gasisi hot, yayaluwa toto i minaa panayawi gamagaliliyau elal nige i gagasisi.^t ⁵He palopitau kakakawel heliya panayawi ana gamagalau, inoke panayawi ana nuwatu elana te hi baaba ge analiya panayawi gamagaliliyau hi hago.^u ⁶Yaa kilau Yehoba wana gamagalau, inoke wana nuwatu elana te ta baaba ge bolo Yehoba hi atena anala hi hago. Yaa bolo nige Yehoba wana gamagalau i oola anala nige hi hahago. Inoke toto o eliyana bosowaina baaba tutunahotina ana Yayaluwa ge baaba kakakawena ana yayaluwa ali getoga ta atena.

Yehoba Iya Tonunuwana Inoke Kila Ta Nununuwana

⁷No heliyamwau nunuwani, ta penununuwana-agila, kaiwena nunuwana paganina i neem Yehoba elana. Henala ebo i nunuwana, he iya Yehoba natuna ge Yehoba ana aatena i gan elana. ⁸Henala ebo nige ni nunuwana, iya Yehoba nige i aatena, kaiwena Yehoba iya tonunuwana. ⁹He Yehoba wana nunuwana eliyala iyaka i pankitela i ola hiwe: Natuna maisena hot i patuna i lau panayawiya inoke iya eliyana kila yawal ta pwawa.^v ¹⁰Nige tage nunuwana hot paganina ta kiteya kila wala nunuwana Yehoba elana, yaa ta kiteya iya i nunuwana-agila ge Natuna i patuna wala gegi powonina.^w ¹¹No heliyamwau nunuwani, Yehoba i nunuwana-agila nabiyani i ola to, inoke bosowaina kila ta penununuwana-agila.

¹²Nige sauga etega gamagal etega Yehoba i kikite, yaa ebo ta penununuwana-agila, Yehoba i minaa elala ge wala nunuwana Yehoba

^q 4:1 Mat 7:15; 1Diy 2:18; 2Diy 7; 1Tes 5:21 ^r 4:2 1Kol 12:3 ^s 4:3 1Diy 2:18

^t 4:4 Mat 12:29; 1Diy 5:4-5 ^u 4:5-6 Diyo 8:47; 15:19 ^v 4:9 Diyo 3:16 ^w 4:10 Loma 5:8-10; 1Diy 2:2

elana iyaka ta paolaolaek.^x ¹³Ta atena te kila ta minaa Yehoba elana ge iya i minaa elala, kaiwena Yayaluwana i pem elala.^y ¹⁴⁻¹⁵I ola al, ebo gamagal etega ni ba, “Yeisu iya Yehoba Natuna,” he Yehoba i minaa elana ge iya i minaa Yehoba elana. (He ama ha kite ge wasana ha wasaan te Yehoba Tamala Natuna i patuna panayawi ana Topwamwal.) ¹⁶Ge i ola al, henala ebo i nunuwana, he iya i minaa Yehoba elana ge Yehoba i minaa elana, kaiwena Yehoba iya tonunuwana. He kila ta atena ge iyaka ta abulilek-an te Yehoba i nunuwana-agila.

¹⁷Wala nunuwana Yehoba elana i bwatabwata ge i olaolaek, inoke lan yatala elana kila atela ni matuwa ge nige ta pupuluwawi. He bosowaina atela ni matuwa, kaiwena wala minamina panayawiya wala pagan i ola Keliso wana pagan. ¹⁸Ebo Yehoba ta nunuwana-an ge iya i nunuwana-agila, he nige ta lolovakun-an. Ebo kila wala nunuwana i bwata ge i olaolaek, he nunuwana paganina lovakun amnanina i ahek yoho, kaiwena lovakun i masalem te ebo Yehoba wana lahi ta nuwanuwatu an. Yaa gamagal toto i lolovakun, ta atena te wana nunuwana nige ga i bwabwata ge i oolaolaek.

¹⁹Kila Yehoba ge gamagalau ta nunuwana-agil, kaiwena Yehoba i nunuwana-agila houwan. ²⁰Ebo gamagal etega ni ba, “Yehoba ya nunuwana-an” ge talina i pihigelgel-an, he iya tokakawi. Kaiwena ebo talina toto i kiteya matanaa nige i nunuwana-an, he ta atena Yehoba toto nige i kikite nige i nunuwana-an. ²¹Ge logugui ya i pem elala i ba, “Henala ebo Yehoba i nunuwana-an, he talina al ni nunuwana-an.”^z

Ebo Yeisu Ta Abulilekan He Yawal Mihomihotina Ta Ahe

5 ¹Gamagalau bolo hi abulilek te Yeisu iya Mesaiya, heliya Yehoba natunau. He ebo tamala ta nunuwana-an, nasi talilau ge nulau al ta nunuwana-agil.^a ²Inoke ta atena te sauga ebo Yehoba ta nunuwana-an ge wana logugui ta henapuan, he iya natunau al ta nunuwana-agil. ³He ebo Yehoba ta nunuwana-an, wana logugui ta henapuan. Yaa wana logugui nige i pupulowan elala,^b ⁴kaiwena kila Yehoba natunau gegewela panayawi wana gasisi ta pakokove. He ta abulilek Yehoba elana, inoke eliyana te panayawi wana gasisi ta pakokove. ⁵Henalau bosowailiya panayawi wana gasisi nihi pakokove? He iyai ya te gamagalau bolo hi abulilek te Yeisu iya Yehoba Natuna.

⁶Yeisu o iya Yeisu Keliso toto i nem panayawiya, yaka i babitaiso wewel elana ge i yaomal saliyana i lau. Nige tage i nem ya te ge i babitaiso wewel elana, yaa i nem yaka i babitaiso wewel elana ge i yaomal al saliyana i lau.^c I ola al, Yayaluwa Bwabwalena i wasa tunahot

^x 4:12 Diyo 1:18 ^y 4:13 2Kol 1:22; 1Diy 3:24 ^z 4:21 Mak 12:29-31 ^a 5:1 1Diy 4:15

^b 5:3 Diyo 14:15,23-24 ^c 5:6 *Baaba Houwan* nu kite.

Yaisu Keliso kaiwena, kaiwena Yayaluwa Bwabwalena iya tobaaba tunahot.^d ⁷Inoke towasa ali gewi eton hi wasa Yaisu kaiwena: ⁸Yayaluwa Bwabwalena, wana babitaiso wewel elana, ge wana yaomal saliyana. Ge towasa bolo eton o wali wasa i olaolaek.^e

⁹Kilau ebo gamagalau bugul etega hi wasaan inoke ta abulilek-an. Yaa Yehoba wana wasa gamagalau wali wasa i bwata lake, inoke binimala ta abulilek-an. He iya iyaka i wasa Natuna kaiwena.^f ¹⁰Henala ebo i abulilek Yehoba Natuna elana, he Yehoba wana wasa iyaka i ahe ge i kukuhkan atena. Yaa henala Yehoba nige i aabulilek-an, he iya Yehoba i awa tokakawi-an, kaiwena Yehoba wana wasa Natuna kaiwena nige i aabulilek-an.^g ¹¹He Yehoba wana wasa i ola hiwe: Yehoba yawal mihomihotina iyaka i pem elala, ge yawal ya puna heiya te Natuna. ¹²Henala Yehoba Natuna i ahe, he iya yawal ya i ahe; henala Natuna nige i aahe, he yawal ya nige i aahe.^h

Nuwatu Mowamowasena

¹³Leta ya ya leleli eliyamiu kaiwena nuwau nuku atena te yawal mihomihotina iyaka ku ahe—komiu bolo ku abulilek Yehoba Natuna elana.ⁱ

¹⁴Atela i matuwa nige ta pupuluwawi ta nok Yehoba elana, kaiwena ta atena te ebo iya wana nuwatu elana ta awanun bugul etega kaiwena, inoke wala awanun ni hago.^j ¹⁵He ta atena te sauga ebo ta awanun elana wala awanun i hahago, inoke ta atena al te hauna gun iyaka ta awanuni elana, iya i pem.

¹⁶Ebo komiu etega talina o ebo nuna ni kite gegi i giginol, gegi lololana yayaluwana nige ni papayaomal, he ni awanun Yehoba elana togegi o kaiwena, inoke Yehoba yawal ni pek elana. Bolo gegi hi giginol toto lololana yayaluwaliya nige ni papayaomal, he heliya baliya te ya babaa. Gegi i gan toto bosowaina gamagal yayaluwana ni payaomal,^k ge nige ya babaa tage nuku awanun Yehoba elana gegi lololal o kaiwena.^l ¹⁷Ginol nanakina gegewena he gegi, yaa gegi enuna i gan toto nige gamagal yayaluwana ni papayaomal.

¹⁸Ta atena te gamagalau bolo hi tabwa Yehoba natunau nige gegi nihi mimi awaawaginoli, kaiwena Yehoba Natuna i matahikagil, inoke tonanakina Seitani nige ni pipihikagil.^m

^d 5:6 Diyo 1:29-34 ^e 5:8 Diyo 15:26 ^f 5:9 Diyo 5:32-37 ^g 5:10 Gal 4:6

^h 5:12 Diyo 3:36 ⁱ 5:13 Diyo 20:31 ^j 5:14 Diyo 14:13; 1Diy 3:21-22 ^k 5:16 Gegi toto bosowaina gamagal yayaluwana ni payaomal, ana sapu heiya lololana ebo ta ba Yaisu iya nige Mesaiya Yehoba Natuna i oola, o ebo toto ta atena i tunahot ta awa nanakan ge ta ba gegetoga-an. Gamagal lololana o nige wana abulilek i gagan, yaa gamagal toto i abulilek Yaisu Keliso elana, Yehoba bosowaina wana gegi gegewena ni ul yoho nige ni yayaomal. ^l 5:16 Mat 12:31 ^m 5:18 1Diy 3:9

¹⁹Ta atena te kilau Yehoba natunau, yaa panayawi gegewena tonanakina Seitani i logugui-an.

²⁰Ta atena al te Yehoba Natuna i nem panayawi ge aatena i pem elala inoke Yabowaine tutunahotina ta atena. Kila ta minaa Yabowaine tutunahotina elana ge ta minaa Natuna Yeisu Keliso elana. Iya Yabowaine tutunahotina ge iya yawal mihomihotina puna.

²¹Natuwau, bahi nuku kukululuek yabowaine kakakawel elal, yaa ali en nuku pek.